

5 CALON GANTI MOYES

Dengan kedudukan pengurus Manchester United, David Moyes, sudah pun diputuskan – dipecat semalam – media kini sibuk pula membualkan siapa yang bakal menggantikan beliau.

Sehingga akhbar ini dicetak, United belum lagi membuat apa-apa pengumuman lanjut.

Berita Harian menyenaraikan beberapa nama pengurus yang dikaitkan dengan tugas tersebut.



1. LOUIS VAN GAAL

Pengurus pasukan antarabangsa Belanda. Beliau dijangka meninggalkan pasukan negaranya selepas Piala Dunia di Brazil Jun ini untuk menggantikan Tim Sherwood di Tottenham Hotspur. Namun, dengan perkembangan terbaru di Old Trafford ini, beliau menjadi calon yang mudah dan murah didapatkan.

Van Gaal juga bukan calang-calang jurulatih. Beliau membimbang Belanda menjuarai peringkat kumpulan kelayakan Piala Dunia dengan rekod tidak tercemar tanpa sebarang kekalahan. Van Gaal pernah membimbang kelab-kelab utama Eropah seperti Barcelona dan Bayern Munich dan pastinya tidak mempunyai masalah menguruskan kelab sebesar United.

2. JURGEN KLOPP

Jurulatih Borussia Dortmund ini sebelum ini pernah dikaitkan dengan kelab Liga Perdana dan kontraknya bersama kelab Bundesliga Jerman itu akan berakhir setahun lagi.

Klopp pengurus berkebolehan dan berupaya meningkatkan semangat kedua pemain dan penyokong.

Beliau membimbang Dortmund menjuarai dua kejuaraan selain membawa mereka ke final Liga Juara-Juara pada tahun lalu, lantas menjadikan beliau antara calon utama mengisi kekosongan di Old Trafford.



3. RYAN GIGGS

Kemampuannya sebagai pemain tidak boleh dipertikai. Beliau calon popular dalam kalangan peminat. Tetapi Giggs dijangka pengganti Moyes buat sementara sahaja sehingga akhir musim apabila United dijangka memilih calon tetap.

Namun, Giggs juga layak menjadi pengurus tetap jika diberi peluang. Setelah menghabiskan hampir tiga dekad bersama United, beliau tahu selok-belok bekerja, tekanan dan keperluan selain amat disegani pemain. Selepas menyaksikan bagaimana Moyes membimbang United, Giggs berada dalam kedudukan terbaik membaiki keadaan, mungkin dengan menggunakan 'resipi' lama yang membawa banyak kejayaan kepada pasukan itu.



4. ALEX FERGUSON

Mungkinkah Ferguson akan tertarik dengan kemungkinan kembali menguruskan kembali United? Ini satu soalan cepums. Kejayaannya sebagai pengurus paling berjaya di Britain tidak perlu dinyatakan lagi.

Tetapi sejak dilantik menjadi anggota lembaga pengarah United, Ferguson nampaknya tidak menunjukkan minat. Mungkin beliau akan menjadi penasihat jika Giggs menjadi pengurus.



5. JOSE MOURINHO

Pengurus 'Yang Istimewa' Chelsea ini pernah melahirkan minat menjadi pengurus United bagi menggantikan Ferguson pada Mei tahun lalu. Selepas melalui musim mengecewakan sejauh ini, United memerlukan pengurus seperti Mourinho untuk mengubah nasib mereka.

Mourinho mempunyai ciri-ciri pengurus yang diperlukan United. Beliau pandai bermain kata-kata, menggunakan taktik psikologi, boleh menaikkan semangat pemain dan penyokong, dan yang paling utama, mempunyai rekod kejayaan cemerlang.



6. PEP GUARDIOLA

Beliau pilihan saya. Rekod kejayaannya bersama Barcelona cukup melayakkannya menjadi calon utama menjadi pengurus United. Jika United mahu menjadi kelab terunggul semula di England, mereka mesti berani mendapatkan pengurus unggul juga. Tetapi mendapatkan Guardiola daripada Bayern Munich bukan mudah atau murah.

Seperti Ferguson, Guardiola menitikberatkan dasar pembangunan pemain remaja dan ia menjadi resipi kejayaannya di Barcelona.

Ia mendidik pemain seperti Xavi, Andreas Iniesta, Lionel Messi (yang didapatkan sejak beliau berusia belasan tahun lagi) dan ramai pemain Sepanyol lain dan memimpin mereka menjadi juara La Liga pada musim 2008-2009, 2009-2010, 2010-2011 dan mahkota Liga Juara-Juara 2008-2009 dan 2010-2011. Guardiola turut terpilih menjadi pengurus terbaik dunia 2009, 2010 dan pengurus terbaik Persekutuan Persatuan Bola Sepak Antarabangsa (Fifa) 2011.

